

Poli'a Tesalonaika Vahe'mokizmi Ese Avonkrezami'nea Naneke

1 ¹Nagra Polinagi, Sailasi'ene Timotigata ama avona Tesalonaika kumate Anumzamofompi mani'naza nagamotarega kreneramune. Anumza Nafatine, Ranti Jisas Kraisi asunku'zamo'ene, rimpa fruzamo'a tamagrane mesie.

²Maka kna tagra, tamagrikura Anumzamofona susu hunenteta, nunamuna huneramantone. ³Na'ankure tamagrama Anumza Nafatimofonte tamentinti nehuta, erizama enerita, avesintezamofa eriza enerita, Rantimo Jisas Kraisi'ma eforema hanigu, kazigazi hutma Anumza Nafatimofa avure e'nerizazankura antahirami vava nehune.

⁴Nafuhete, tagra antahi'none, Anumzamo'a avesineramanteno, Agri'a vahe mnisazegu huhampritamante'ne. ⁵Na'ankure tagrama knare musenkema nehunana, ke'age nosune. Hianagi Ruotge Avamumofa hanavere tagu'areti huta huama nehunanki, tagra inakna vahe'mota tamagrira tamaza hunakura nehune, tamagra tageta antahita hu'naze. ⁶Tamagranena, tagrama nehunaza tavaririta nehuta, Ramo'ma nehiankna nehutma, tamagra Anumzamofa naneke e'nerizageno, rama'a knazana neramizanagi, Ruotge Avamumo tamazeri otigetma muse nehaze. ⁷Ana hu'negu tamagra maka Masedoniane Akaia kumate mni'naza mono vahetera, mago knare avamezankna hutma mani'naze. ⁸Na'ankure Ramofo kemo'a tamagripinti agerura runo e'neana, Masedoniane Akaia kumateke agerura orune. Hianagi tamagrama Anumzamofontema tamamentintima hu'naza zamo'a maka kumatega vuno eno hige'za antahi'nazankita, tagra mago kea osugahune. ⁹Na'ankure rama'a vahe'mo'za tamagrama neravreta, havi anumzama tamefi hunemitma, kasefa huno mani'nea tamage Anumzamofontema tamamentinti hu'naza zana tasami'naze. ¹⁰Hagi monafinti Anumzamofa mofavremo esigu avega anteta mani'nomofa, frinefinti azeri oti'nea Ne' Jisasi, Anumzamofa rimpa hezampinti tahokeno taguvazi'nea zankura kea neheze.

Poli'a Tesalonaika kumate eriza eri'nea naneke

2 ¹Nenafugata tamagra antahi'naze, tamagritegama esunazamo'a amnezanknara osugahie. ²Tagri'ma Filipai kumate'ma tazeri haviza nehu'za, nerahe'za hu'nazazana, tamagra antahi'naze. Hianagi Anumzamomo'ma tazeri hanavetigeta, Agri knare musenkea huama huta tamagri'enena neramasamunkeno, maka vahe'mo'za ha'rerante'naze. (Apo 16:19-24, 17:1-9) ³Tagrira oku'a antahintahitia omnene, tamagri'ma tagrarega tamavrenenteta, havige huta reramatga nosune. ⁴Hianagi anahukna huno Anumzamomo'a tagrira tageno antahino huteno, knare musenkema huama hu erizana, taminegeta e'nerunanki, vahe'mo'za muse hurantesazegura nosunankino, Anumzamomo Agra'a tagu'afina refko huno nerage. ⁵Na'ankure tamagra ko antahi'nazageno huama hugahie. Tamagrira masavena noramita, mago zantamigura ke tanunu nehuta ama kea nosune. ⁶Tagrama nehunana, tamagro, mago'a vahe'mo'za tagi erisga hurantesazegu nosune. ⁷Tamage, Kraisi aposol vahe'ma mni'nonazamo knazana tamigahianagi, tagra akoheta mani fru nehuta, mofavrema nererama amima nemino kegvama hunteankna nehune. ⁸Tagra razampi tamagrira tamavesi neramanteta, Anumzamomo Knare Musenkegera noramasamunanki, tagrati tavufganena neramamune. Na'ankure tamagra raza tagri tavurera mani'naze.

⁹Nenafugata tamagra antahi'naze, kenage'ene feru'enema tamuna nehagegeta maraguzatita tagrima taza haniazanku erizana e'nerita, Anumzamomo Knare Musenkea huama nehunana, magomomo knaza eri amisunegu anara nosune. ¹⁰Tamagra antahinazageno, Anumzamomo'enena tamamentintima Kraisintema nehaza nagamotare'ma hunona ruotage tavutavara, tageno antahino hu'ne. Tagra fatgo tavutavara Anumzamomo avufi nehuta, havi tavutavazana osu'none. ¹¹Tamagra antahinaze, ne'fama mofavre'amomo tutu hunteno azeri hanaveti ke asamiankna tavutavama huramantenona zana tageta antahita hu'naze. ¹²Tagra ana nehanunketma tamagrama kama vnazana, Anumzamomo'ma tamagi nehuno, Agri'a masanentake kuma erigahaze hu'nea Ne'momo so'e kumapi vugahaze.

¹³Maka kna tagra Anumzamomofona susu hunentone, tamagrama tamametintima hu'naza zankura, ana kema huama hunketma tamagrama erinazana, vahe'momo ke eriaza hutma e'ori'naze. Hianagi tamagra Anumzamomo tamage ke eri'naze. ¹⁴Na'ankure nerafugta, Anumzamomo nagama Kraisi Jisasimpi Judiama mni'naza naga'mokizmi zmavuzmava zmavaririta tamagra hiho. Na'ankure zamagranena anahukna hu'za tamagri vahe'mo'za knazama tamami'neaza huza, zamagri'enena Jiu vahete'ma hu'nazaza hu'naze. ¹⁵Jiu vahe'mo'za Ramofona nehe'za, kasnampa vahe'mokizmia nezmahe'za, tagrira tahe'za tretufe

netre'za, zamagra Anumzamo'a muse osiaza nehu'za, maka vahera ha'rezmante'naze. ¹⁶Megi'a vahe'mofontema zmahokeheno zmaguvazisia kema huama nehunkeno, rehiza hunerantazageno, anama hazazamo'a kumima hu avamena agatereno avite'ne. Hianagi e'inahukna vahetera, henka Anumzamofu rimpapezamo zamagritera megahie.

Poli'a Tesalonaika vahe zmagesia zankura tusiza huno avesi'nea naneke

¹⁷Hianagi nenafugate tagra osia knafi tamagri' enena omanunanagi, tagra tamagrikura tagera okanitfa hu'none. Tamagrima eme tamagezankura tusiza nehuta, eme tamagenaku nehune. ¹⁸Na'ankure tagra tamagritega enaku nehune. Nagra Poli'na enaku nehuana, Sata'a kana rehiza hunerante. ¹⁹Ranti Jisasi Kraisi'ma esia knazupa, na'amo tazeri amuhama humisunazantia mesigeno, nazamo musema hanunazana mesigeno, tazeri antesgahu kini fetoritia Rantimofu avurera megahie? Tamagra ana musezantia mani'naze. ²⁰Tamagriteti, tagra ra tagi enerita musena hugahune.

**Poli'a Timoti huntogeno Tesalonaika vahe
zmazeri hanavetina ku vu'nea naneke**

3 ¹Hanki tamagri'ma eme tamesesuna tavesizamo, marerigeta manigama nosuta, knarema haniana, Atens kumate manigahune hu'none. ²Ana nehuta nerafu Timoti'a, Anumzamofu eriza ne'mo Kraisi knare musenkemofu eriza e'neria ne'mo, eme tamamentinti tamazeri hanavenetino, tamazeri hanaveti kea tamasaminogu hunte'none. ³Tagri'ma tavesiana, mago'amotma amama tagrama e'neruna knazankura antahigna osiho. Tamagra antahinaze, tagrikura knazana erigahaze hu'naza vahe mni'none. ⁴Na'ankure tamage huta tamagra nema korapama mni'neta tamasami vava huta, knazampina ufregahune huta hunonankino, ana knazamo'a, antahinaza kante fore huno evu'ne. ⁵E'ina agafare nagrama avega antena manigama nosuna, reramatagamahu ne'moma reramatga huzanku koro nehuna, tagrama erizama tamagripima eri'nona erizamo amnezankna huzanku, tamamentinti eme kenogu nagra Timoti hunte'noe.

Timoti knare naneke erino ne-egeno Poli'a muse hu'nea naneke

⁶Hianagi menina Timoti'a tagrite eno, tamagrama tamamentinti nehutma ovesinte avestema nehaza zankura, musenke eme nerasamino, antahi so'ema humanerantaza zanku'ene, tamagrima tamagenaku nehunankna hutma, tagrima tagenakuma nehaza zankura eme tasamine. ⁷Ama'na agafare, nenfugta vahe'mo'zama knazama tamiza tatazampima unefronkeno'a, tamagrama tamentintima hu'naza zamo maka knazantifina tazeri hanavenetie. ⁸Na'ankure tagrama menima tasimu

erita mni'nonana, tamagrama Ramofompi hanavetitama mni'naza zamo higeta tasimura erita mani'none. ⁹Tagra Anumzamofu susu hunentone. Tamagrama hazazamo higeta, Anumzamofu avurera tagra musena nehune. ¹⁰Hanine zgenena tamavufima tamagezankura nunamuna hanavetita huvava nehuta, tamamentintifima atupama hu'nesazana, tagra tamazeri hanavetigahune. ¹¹Menina tagri Nerafa Anumzamofu'ene, Jisasi Rantimokea vanuna kana taveri hanaketa tamagritega vugahune. ¹²Tagri'ma tavesiana, Ramo'a vahe'ma avesinte avu'avazana eri aviteramantesigetma aviteta maninetma, magoke magokemotma ovesinte avesinte nehutma, tamagri'ma tamavesi neramantonaza hutma, ana miko vahera zmavesizmanteho. ¹³E'ina hu'neankino, Jisasi'a maka Naga'anema esia knarera tamazeri hanavetina, maka hazenketami omnena, ruotge huta nemanita, manifatgo nehuta, Anumza Nafatimofu avurera hazenke'tamia omanegahie. Tamage.

Anumzamo muse hania kante manisunazamofu naneke

4 ¹Nafu naganaheta Ramofu Jisasimpi mani'naza nagamota, rempima huraminona kante antetma manihogu tagra tutu huneramanteta, tamazeri hanavenetunanki, tamagrama nehazaza hutma, mago'ane hanavetita ana avu'avara hiho. ²Na'ankure tagrama kasegema, Ramofu Jisasi hanavetima tamasamunketma ketma antahitma hu'naze. ³Na'ankure ama'i Anumzamofu avesizane, mani agru hutma maka monko avu'avazampina maniho. ⁴Tamagra mago magomotma tamavufga kegva nehutma, tamazeri agru nehutma, ruotge hutma maniho. ⁵Tamagra havi tamagu tamagesamofona kazokzo vahe'agnara nosutma, Anumzamofu keno antahino osu vahe'mo'za nehaza zana osiho. ⁶Tamagra Ramofu amagama nentesamokizmia, rezmatga hutma mono Neramafu a'nea zmazeri savri osiho. Antahiho, ko tamavumro tamantenone. Iza'o e'inahu avu'avazama hanimofona, ana hazenke'arera, Ramo'a azeri haviza hugahie hu'none. ⁷Na'ankure Anumzamofu'ma tagrima tagima hu'nea agafa'a, agru osu avu'avaza avaririhogu tagi osu'neanki, mani ruotge hanunegu tagi hu'ne. ⁸E'ina hunegu iza'o ama kema amefima hunentemo'a, vahe'mofu ke amagena hunonteaniki, Anumzamo Ruotge Avamuma tamaminemofu naneke amagena hunemie.

⁹Nenfugta avesintezamofona mago'ene avona kreta, ovesinte avesinte hiho huta osugahunanki, Anumzamo ovesinte avesinte hu'zana ko rempi huramine. ¹⁰Na'ankure tamage, maka Masedonia kumate mani'naza tafuhegata, makamotma ovesinte avesinte ko hu'naze. Hianagi tafuhegata huhanavetike tamasamita, mago'ene ovesinte avesinte hiho huta neramasamune. ¹¹Tamagra fruma huno manizankura hanavetitma maninetma, tamagra'a erizana eriho. Koma hihoma hu'na tamasami'nonaza hutma, tamagratami tamazanu eri'zana erigahaze.

12 E'inahukna nehutma, megi'ama mani'naza vahetera, knare tmavutmava nehutma, mago'a zankura atupara osugahaze.

Fri'naza vahe'mo'za otisaza naneke

13 Nafuhegta, mono nerafuza koma fri'namo'za nankna hugahazafi, tamagra ketma antahitma nehutma, Jisasi'ma esigu amuhama nosaza vahe'mo'za zavimanetaza zana osugahaze. 14 Na'ankure tagrama tamentintima hunana Jisasi'a friteno oti'neankino, anahukna huno Anumzamoa'a zmentintine vahe'ma fri'naza vahera zmazeri otisige'za, Jisasi'ma esiankna zupa magoka egahaze. 15 Na'ankure amanahu kante Ramofonkea neramasamune, mani'nona vahe'mota ovunenukeno, fri'naza vahe'mo'za otiza ugota hu'za marerigahaze. 16 Ramo'a Agra'a monafinti eneramino, hanavege huno kezanke nehanigeno, ugota ankeromo'a ageru nerinkeno, Anumzamofu ufemo krafa nehanigeno, vahe'mo'za Kraisinte zamentinti hute'za frinesaza vahe'mo'za kote'za kerifintira otigahaze. 17 Anantera tagrama ofritama maninesuna vahe'mota, tavresigeta mrrerita hampompi omeri mago huteta, magoka anagamu Ramofona ome tutagiha hunenteta, maka kna Agrane manivava hugahune. 18 E'ina hu'negu ama nanekenu, magoke magokemofona ozmazeri hanaveti azmezeri hanaveti hiho.

Ramo'ma ete esnigu tro huta manisnuna naneke

5 1 Nagra anazama efore'ma hania zamofonkea, e'i knarero, e'ina zupa fore hugahie hu'na nenafugta kreoramigahue. 2 Na'ankure tamagratmi antahi'naze, Ramo'ma esianknamo'a, kumazafa vahe kenage eankna huno egahie. 3 Vahe'mo'za hu'za knare huta mani'none nehu'za, tarimpa fru huta manisoe hune hu'za hanaza knafi! Ame huno zmazeri haviza hu'zamo'a zamagritera, anemo'za mofavre antenaku'ma nehazageno zamata negriankna zmata negrina, zamagra ana knazampintira mani onkanegahaze. 4 Hianagi tamagra nenafugate, hanimpina omninazankino, ana knamo'a kumazafa vahe'mo'za hanimpi azanknara hanigeta antri osugahaze. 5 Na'ankure tamagra maka'motma tavite vahe maninetma, msare vahe mni'naze. Tagra kenage vahera omanita, hanimpi vahera omani'none. 6 E'ina hu'negu atrenketa mago'amo'za nemasazaza huta omaseta, tavumo'a hari nehina, ama' antahintahi e'nerita kva huta manigahune. 7 Na'ankure zmavuma masaza vahe'mo'za kenegeke nemasageno, aka tima nenaza vahe'mo'za, kenegeke aka tina nene'za neginenaze. 8 Hianagi tagra masare vahe mni'nonanki, atrenketa ama' tagutagesa nentahita, tamentintima huzane, vahe'ma avesinte avu'avazana tamimizare hanko reheriaza nehuta, Jisasi'ma taguvazino tavresiazanku nentahita amuhama nehunazana, fetori anteaza huta antegahune. 9 Na'ankure Anumzamoa'a rimpahe'zama'a

erigahaze huno huorantene. Hianagi Ranti Jisasi Kraiimpinti tahokeno taguvazizana erisunegu huhampirante'ne. ¹⁰Jisasi'a tagriku huno fri'neankita, fri'nazo tasimu erita mani'nono, tagra Agrane magopi manisunku huno fri'ne. ¹¹E'ina hu'negu mago magomotma, ozeri hanaveti azeri hanaveti nehutma, menima nehazaza hutma mago magomofona zmazeri hanavetita maniho.

Mono vahe'mo'za hanaza zamuzmazamofa neneke

¹²Hianagi nenfugata, tusi maraguzatiza Ramofonte manisaza'zamofa nanekema rempima hunerami'za mono kva vahetamimofona, kegva huzmanteho huta neramasamune. ¹³Hagi erizama e'neriza zanku zmesizmanteta, zamagrira zamagi erisaga nehuta, magoke magokemotma tamarimpa frune maniho.

¹⁴Nerafugate, tagra tamazeri otike hanunketma erizama e'ori zmesrama nehaza vahera zmazeri fatgo nehutma, koroma nehaza vahera zmazeri hankavenetitma, hanavema oti'nesaza vahera zmazeri hanavetihio. Ana nehutma maka vahe enena fru hutma maniho.

¹⁵Mago'mo'e huno havizama huntessimofona, nona'a havizana huonteno. Hianagi maka kna knare avu'avaza ohunte ahunte nehutma, maka vahetera anahukna tamavutmava huzmanteho. ¹⁶Makazupa muse hiho. ¹⁷Nunamuna otretma makakna huvava hiho. ¹⁸Hakare'zampina Anumzamofona susu huntelho, na'ankure Jisasi Krasimpima e'inahu tamavutamavama huzankura Anumzamofona avenesie. ¹⁹Tamagra Ruotge Avamumofa teve ahesu hu avu'avazana osiho. ²⁰Kasnampa kemofona antahi amnezanknara osiho. ²¹Hianagi rezaganetma makazana ke so'e nehutma, knarema hunesiazana azeri akona hiho. ²²Ana nehutma, maka havi avu'ava zampintira maniganeta maniho.

²³Hagi rimpa fru Anumzamo'a, Agra maka sese huramanteno tamazeri ruotage nehuno, avamutamine, tamagu tamene, tamavufanena kegva huramantena, Ranti Jisasi Kraisi'ma esianknarera kema hurantezana omanetfa hugahie. ²⁴Anumzamo'ma tamagima hunemo'a, fatgo huno ke'are amage antegahiankino, Agra anahukna huno eriknare huramantegahie. ²⁵Nenfugate tagrikura nunamuna huranteho.

²⁶Maka tafu'hemotma mono tamavutamava hutma tamafukre tamafakre hiho. ²⁷Nagra hanave ke tamasamuanki, ama avona hamprinke'za, maka tafuhe'za anta'hiho. ²⁸Hagi Rantimofa Jisas Kraisi asunku'zamo'a tamagrane mesie.